

當祂 Iáu Chhōe 會 tiòh

Tiòh 趁上主 thang chhōe-tiòh ê 時來 chhōe 祂，tī 祂相 óa 近 ê 時求叫祂。
 (《全民台語聖經》以賽亞書 55：6)

以賽亞先知苦勸伊 ê 同胞—kah 咱—為 tiòh 備辦彌賽亞 ê 降臨，咱 kan-taⁿ tiòh 做一項 tãi-chì：走 chhōe 上主。這 m̄ 是被動 ê 策略，m̄ 是叫咱 tī 邊 á 恬恬坐，kan-taⁿ 顧咱家己 ê tãi-chì，面對咱家己 ê 危機，看咱 ē-tàng thàn gōa chē 錢，tòa gōa 大間 ê 厝，以及 tī 咱 ê 社區努力追求成功；完全 m̄ 是 án-ne。

Án-ne，這到底是啥物 leh？「走 chhōe 上主」ê 意義是啥物？

「走 chhōe」是一個主動 ê 語詞，是有意 ê，koh 是積極 ê。走 chhōe 上主是咱 ē-tàng 做 ê siōng 根本，koh siōng 重要 ê 決定。Tī kah 上帝形成一個充滿活力 ê 關係，thang 塑造咱一生 ê 過程中，它扮演一個 siōng 重要 ê 角色。無論咱幾歲，不管咱 ê 生活經驗 án 怎，咱必須積極來走 chhōe。經過幾世紀以後，甚至 tī chit-ê 時刻，以賽亞 iáu 是 teh 呼召咱：Tiòh 走 chhōe 上主。

M̄-koh，伊 hit 句出名 ê 話 ê 前半段 mā 平平重要：「趁上主 thang chhōe-tiòh ê 時。」這是啥物意思 leh？Kám 講上主有可能會消失去，會永遠 chhōe bē-tiòh？

雖然上帝永遠 bē 離開咱，m̄-koh，咱會因為咱家己 ê 無作為，soah 喪失 kah 創造主建立合作關係 ê 機會。咱會一工過一工，táuh-táuh-á 浪費掉咱 ê 機

會，因為咱延遲咱 ê 決定 á 是參與，koh kā 咱 ê 注意力轉向其它 tãi-chì，tú 親像古早 ê 希伯來人 tiāⁿ-tiāⁿ 做 ê 全款。若是咱選擇 hit 款愚戇 ê 路，tī 咱性命 ê 路尾，咱會喪失 kah 宇宙之王建立一個強大、有冒險性，koh hō¹ 人興奮 kah 歡喜 ê 合作關係 ê 機會。

世間有兩種人，一種是遵照以賽亞 ê 忠告，對上帝講：「祢 ê 會得成」，另外一種人是講：「我 ê 會得成」。這 tòh 是咱 tiòh 面對 ê 決定。

祈禱：上主 ah，我承認我 tiāⁿ-tiā 真容易拖延「走 chhōe 祢」chit 件 tãi-chì。我 mā 真容易講：「有一工我 beh 成做一個極好 ê 基督徒」，á 是「明年我 beh 活出耶穌 ê 言行—m̄-koh chit-má iáu 未到時 chūn。」上主 ah，求祢幫助我 tī 此時此地走 chhōe 祢。我奉耶穌 ê 名祈禱。阿們。

(2002.01.13)